

كتاب: الأساس فك العلاج الجمعد (50)

مؤتمر: العلاج الجمعد والعمليات الجماعية: الأمل فك أوقات عصيبة
(القاهرة 25 – 27 سبتمبر 2013)

العمل بالأحلام فك العلاج الجمعد (2)

<http://www.arabpsynet.com/Rakhawy/RakD29713.pdf>

بروفيسور يحيى الرخاوي

mokattampsy2002@hotmail.com - rakhawy@rakhawy.org

نشرة "الإنسان والتطور" 2013/07/29
السنة السادسة - العدد: 2159



مقدمة: وصلنا أمس إلى اختبار فرض "نحن نعمل - نبدع- أحلامنا"، ومن خلال تجربة استحضار وعى خاص بذلك، تجاوب أفراد المجموعة: مرضى ومدربين مع التجربة بتلقائية غير متوقعة، واكتشفنا من خلال قراءة ثلاثة استجابات، كيف يمكن أن يشترك أكثر من فرد في وعى إبداعى واحد، إما بقبول الإضافة، أو التعديل، أو الدعوة ، أو الرفض، وأنه ربما يكون هذا هو السبيل إلى فهم المدخل إلى تكوين الوعى الجمعى، بدءا بالوعى "البين - شخصى" -Inter- personal .

ونكمل اليوم قراءة بقية الاستجابات بنفس المنهج تقريبا:

.....

د. يحيى: يا ساره د. دينا تعرفك كويس، وأديكى شفتى هى لعبتها إزاي، هى اللى ابتدت، وهى اللى استعملت كلمة "أعمل" (حلم) ودى كلمه جيدة جدا، نفعتنى انا وخلصنا نشتغل كويس، وأديكى شفتى "صبرى" و"مروه"، وعرفتى احنا بنعمل إيه، بنعمل حلم د.دينا حاتبقى جنبك، وتسنذك شويه لحد ما تشتغلى

ساره: انا دلوقتى عايشه حياة تعيسه

د. يحيى: وبعدين بقى!!!؟ (يا سارة) الحلم حركه، حياه تعيسه دى صفه، شكوى، تقليبها مثلا: يعنى انا دلوقتى حاسه انى تعيسه، وعشان كده رايحه جايه عامله زى كذا كذا، ياللا كملتى....

ساره: انا دلوقتى ماشيه فى الشارع وحاسه ان الناس كلها بتتكلم عليا وحاسه ان اخواتى

حايقتلوني

د. يحيى: قوم حصل ايه؟

سحر: [1] حد قتلك فيهم ؟

ساره: حاسه وأنا نايمه حايقتلوني بالسكينة، بأى حاجه علشان (تسكت)

رضا: مين فى إخوانك اللى كان بيخطر يفتلك فى الحلم

ساره: كلهم

رضا: كله كله؟ ماحدث حاول يدافع عنك؟

ساره: لآه

رضا: ولا ماما ولا أى حد؟

د.دينا: صرختى أو جريتى؟

ساره: صرخت وجريت، وحد لحقنى وأنقذنى منهم،

بس بس خلاص، أنا باحس إن الناس كلها بتحبنى

د.دينا: ده حلم ده؟

ساره: آه

تعقيب على استجابة "سارة": نلاحظ ما يلي:

- ❖ أنها بدأت بعيدة عن ما هو حلم، بل وعن "هنا والآن" بتعميم على حياتها، "عايشة حياة تعيسة".
- ❖ اعتراض المدرب، وتنبئها أن الحلم "حركة"، وتذكيرها بأن التزامها بـ "هنا ودلوقتي" سوف يساعدها، ثم التأكيد على الحركة باقتراح أنها ".رايحة جاية"، قلب الوصف العام، إلى حركة آنية.
- ❖ انتقلت سارة فورا إلى حركة الحلم، وانطلقت بوعى الحلم إلى الشارع.
- ❖ ظهر فورا ما يشبه "ضلالات الاضطهاد حتى القتل" وهنا يمكن البحث عن علاقة إبداع الحلم بتكوين الضلال ، فلو أن سارة جاءت تشكو من "أنهم سوف يقتلوننا" إذن لشخصت فورا بأنها تعتقد اعتقادات وهمية خاطئة.. إلخ، وليس أنها تحكى عن محتوى وعى آخر، ليس بعيدا عن وعى اليقظة.
- ❖ ثم يضاف ما يشبه "ضلالات الإشارة" (الناس كلها بتتكلم على).
- ❖ ثم يتحدد المطاردون والقتلة بإخوتها بالذات.
- ❖ بعد ذلك ، وبدون دعوة، وعكس ما حدث فى الحالتين السابقتين (إلا من رضا وكان تعقيا على سطحية الحلم: ده مش حلم دى قصة) تداخل مشاركون تلقائيا وبدون دعوة من المدرب، فبمجرد أن حرك المدرب سارة للإكمال "قوم حصل إيه؟؟"، تدخلت سحر سائلة: "حد قتلك فيهم" [21].
- ❖ أضافت سارة هنا أنها "تايمه"، مع أنها فى كامل يقظتها، لكنها ما زالت فى وعى الحلم ، الذى لا ينشط فى الأحوال العادية إلا أثناء النوم.
- ❖ ثم تداخلت "رضا" بنفس التلقائية تسأل سارة أن تحدد شخصا بذاته هو الذى يريد قتلها، وحين ترد سارة انهم "كلهم"، توصل رضا، وتضيف سؤالا عن احتمال أن واحدا من إخوتها يكون مدافعا عنها، فتتكرر، وحين تمد رضا السؤال إلى أن تكون المدافعة هى أمها، تنكر سارة أيضا.
- ❖ وهنا تتدخل د. دينا، والأرجح أنها لم تتدخل كطبيبة، بقدر ما تدخلت مشاركة فى الوعى المشترك سائلة عن تفاعل سارة لكل هذا "صرختى أو جريتى".
- ❖ تستجيب سارة استجابة غير متوقعة (منى على الأقل) أنها صرخت وجرت، ولحقها من أنقذها منهم، بصراحة أنا تصورت أنها سوف تستيقظ (أى تخرج من وعى الحلم) فى هذه اللحظة، لكن الذى

حدث كان مفاجأة لي، لأنها أضافت أن العكس حدث "بس بس خلاص،
أنا باحس إن الناس كلها بتحبنى".

❖ وحين تسأل د. دينا متعجبة، أو مستكشفة، أو متعلمة :
ده حلم ده؟، فتؤكد سارة أنه هو كذلك "آه".

تعقيب عام على حلم "سارة": يظهر لنا هنا ما لاح فى البداية، كما يلي:

(1) أن الوعى الجمعى الذى يتكون، إنما ينشأ بما يسمى الوعى "البين -
شخصى" غالبا، وزيادة عدد المشاركين تدريجيا فى تشكيل الحلم ربما
يشير إلى بداية تكوّن الوعى الجمعى.

(2) أن وعى الحلم ليس خيالا ولا هو وعى اليقظة برغم ظهوره فى
حالة اليقظة.

(3) إن العلاقة بين إبداع الحلم وتكوين الضلالات علاقة وثيقة.

(4) إن مشاركة الآخرين فى نفس الوعى كانت السبيل إلى تصالح ربما
يكون هو الذى أدى إلى إعلان سارة أنه "بس بس خلاص".

(5) مع أنني شككت أن يكون التصالح جذريا، حين انتقلت إلى العكس
تماما، وأنها "أنا باحس إن كل الناس بتحبنى" ، خشية أن تكون لجأت إلى
ميكانزم عكسى هو "تكوين رد الفعل" لإنهاء الحلم فجأة مثلما حدث لمن
لعبوا قبلها.

ثم نكمل:

.....

د.يحيى: طيب تدى يا ساره الكوره لمين

ساره: لأحمد

د.يحيى: أنا دلوقتى ...

أحمد: أنا دلوقتى ... فى ملاءة عندنا فى البلد، المكان ده زراعه فى الشتاء، واحنا بالليل، نازل أنا
وأربعة صحابى المفروض إن كان فيه واحد جاى معنا بس أنا مارضيتش أجيبه، هو إسمه وائل
وإحنا قاعدين فى غيط كده فيه عشة فى الأرض، لقيت صاحب الغيط أمامى وأنا لوحدى فجأة كده
والناس اللى معايا مش موجودين وصاحب الغيط أمامى وأنا لوحدى لقيت عماد أخويا جه، ورحنا
ضاربين الراس وموتناه، أنا اللى موته فرحت المستشفى لما أغمى عليا صحيت كده ورحت أعرفت
إنى أنا اللى قتلته

د.يحيى: متشكر تدى الكوره لمين

.....

تعقيب على استجابة "أحمد": نلاحظ ما يلي:

❖ انتقل أحمد على الفور إلى مسرح الحلم، "ملاءة فى البلد"

وزمنه 'فى الشتاء، ليلا'

❖ أحضر أصدقاءه الأربعة، واستبعد خامسا لم يحضر أصلا لكنه

ذكره فالتسع زاوية الحلم ، ولا أعرف لماذا سمّاه دون سائر

الأصدقاء، لكن ليس هذا هو المهم، المهم الحركة، والسرعة

❖ اختفاء الأشخاص فجأة وظهورهم فجأة هو من طبيعة

إبداع الحلم عادة

- ❖ الاعتداء على صاحب الحقل حتى الموت بعد أن أحضر أحمد أخاه - إبداعا- فى الحلم، وبالاسم (عماد) كانت نقلة لا توحى بها بداية الحلم، وهذا يؤكد أنه أقرب إلى وعى الحلم.
- ❖ إقراره أنه القاتل، برغم اشتراك أخيه معه فى الضرب، قد يكون ذا دلالة ليست للتفسير، وإنما نفى الربط السطحى بين حضور أخيه وجريمة القتل
- ❖ الإغماء فى محاولة نفى ما حدث، لم ينفع إلا لفترة وجيزة، فهو حين أفاق اعترف،
- ❖ ثم توقف فجأة مثل الآخرين.

تعقيب عام على حلم "أحمد":

- (1) رجعنا إلى "هنا والآن" بعمق كاف يطمئننا أننا فى وعى الحلم
- (2) كانت حركية الظهور والاختفاء من الدلائل التى أفنعتنى أننا فى وعى الحلم فعلا.

.....ثم نكمل:

د.يحيى: متشكر تدى الكوره لمين

أحمد: لأى حد وخلص، للأستاذ عبد الحميد

عبد الحميد: أنا دلوقتى رايح المنيب، أنا دلوقتى رايح أركب عربية البلد وأنا باحب البلد، باحب

الريف وباحب أكل الريف بارتاح نفسيا لما باخرج

د.يحيى: (مقاطعا) إنت عمال توصف مشاعرك؟ يا راجل قول أى حاجة فيها حركه

عبد الحميد: كل خطوه باخطيها فى البلد، وأنا راكب العربيه بأبصّ على الزراعه، باحب الزراعه

جدا، فرحت عند أختى، غدّتى وقعدنا إنكلمنا مع بعض وبعد كده خرجنا إتمشينا، وبعدين دخلنا تانى

وبعدين بدأ العشاء،.....، وبس

د.يحيى: كل ده بالنهار

عبد الحميد: لأه المغرب، لأه أنا باحب الزراعه باحب المراكب الشراعيه بارتاح نفسيا

د.يحيى: تدى الكوره لمين

عبد الحميد: للأخت سحر

تعقيب على استجابة "عبد الحميد": نلاحظ ما يلى:

- ❖ واضح أنها من أكثر الاستجابات بعدا عن ما أسميناه "وعى الحلم"، فمنذ بدأ الحكى بوصف مشاعره أكثر من الحركة، فنبهه الطبيب القائد وهو يخلط بين الحركة وبين ميوله الشخصية لكذا، وكيت، وبرغم نقلة الزمن غير المتوقعة من الغداء للعشاء، إلا أنها بدت بطيئة وعلى نفس خط العرض تقريبا، لينتهى الحلم الذى هو ليس حلما بوصف ميوله أيضا ، حتى النقلة إلى حبه للمراكب الشراعية يمكن أن تضم إلى وصفه إلى حبه للبلد، وحبه للريف، وكل هذا يؤكد أنه كان بعيدا نوعا ما عن ما أسميناه "وعى الحلم" .

ونواصل:

د.يحيى: تدى الكوره لمين

عبد الحميد: للأخت سحر

د.يحيى: أيوه كده، ياللا يا سحورة أنا دلوقتي

سحر: أنا دلوقتي باحلم

د.يحيى (مقاطعا): لأه!! إيه باحلم دى!! إنتى حاتبوظى الدنيا، إحنا بنعمل حلم، ياللا: "أنا

دلوقتي....."

سحر: طيب، طيب أنا دلوقتي شوقته أمامى وهو عمال كل شويه أشوفه فى نفس المكان وأنا مش

عاوزه أشوفه كل لما يبعد عنى أصادف ألاقية أمامى

.....: [31] هو إيه ده ؟

سحر: شخص كده فى الحلم كده

؟؟...: ومش عارفاه ؟

سحر: لأه عارفاه

؟؟.....: طيب ماتقولى لنا مين ده

سحر: مش عارفه كل لما اشوفه أمامى أحاول

د.يحيى: تحاولى

سحر: هو فى الحلم شفته أمامى بيجرى بعيد عنى، يطلع لى مثلا من الحاره دى آجى فى ناحيه

تانيه ألاقية أمامى برضه، فحاولت إنى أنا أبعد بعيد فجآه لقيت إن هو اللى بعد عنى أنا باحاول إنى

أروح له مالاقيتهوش، فصحيت من النوم الحمد لله

د.يحيى: تدى الكوره لمين

سحر: للدكتور محمد

تعقيب على استجابة سحر:

❖ كان الحلم حاضرا فى "هنا والآن" بدرجة كافية وخاصة

فى بداياته "أنا دلوقتي شفته أمامى".

❖ على الرغم من أنها استعملت تعبير "فى الحلم" أكثر من مرة،

وقد نبهتها أول مرة ، ثم تغافلت المرة الثانية حين تبين لى أنها فعلا

فى "وعى الحلم"، فقد حضرت فى هنا والآن فورا "كل شوية اشوفه فى

نفس المكان".

❖ الذى حضر أولا فى واقع الحلم هو الشخص، وهو شخص

حاضر غائب، أو متقلب الحضور والغياب وهذا من طبيعة الحلم.

❖ والموقف من هذا الشخص مختلف لأنه لا يطاردها،

وإنما يتبدى ليختفى، وهى التى تبتعد.

❖ لكنه حين ابتعد، أفتقدته، وراحت تبحث عنه ولم تجده.

.....

د.يحيى: تدى الكوره لمين

سحر: للدكتور محمد

د.يحيى: أن الأوان يا بو حميد

سحر: آه علشان إحنا تعبنا

د.يحيى: أنا دلوقتي

د.محمد نشأت: أنا دلوقتي فجآه لاقيت نفسى راكب العربيه بتاعى فى شارع نازل لتحت كان

العربييه الدركسيون ماشى عادى، وفجأه مابقتش قادر أتحكم فى العربييه، والعربييه مابقاش فيها فرامل رحت خابط فى شجرة، والعربييه إدغدغت، راحت العربييه متصلحه مره ثانيه، ورحت راكب العربييه تانى، ورحت ماشى بالعربييه والشارع برضه نازل لتحت راحت العجله طاييره فرحت خابط فى رصيف والعربييه إتصلحت تانى رحت راكب نفس العربييه، رحت مكمل بيها وكان الشارع برضه نازل لتحت راحت صاحى من النوم، وأدى الحادثه الثالثه

د.يحيى: تدى الكوره لمين

د.محمد نشأت: لياسمين

تعقيب على استجابة "د. محمد":

❖ على الرغم من أنه يوجد نوع من التكرار، إلا أن تكثيف الزمن فى صورة تصليح العربييه الفورى، واختلاف سبب الحوادث (غياب الفرامل ثم طيران العجلة) يعطى للحلم نكهة "وعى الحلم" بدرجة متوسطة.

❖ انتهى الحلم كالعادة فجأة، لكنها نهاية مفزعة بلا حسم، فقد انتهى والعربة فى منحدر مما يوحي باحتمال حادث جديد، أو لا، فجاءت نهاية مفتوحة.

ثم نواصل:

د.يحيى: (لياسمين) أنا دلوقتى ... (كملتى)

ياسمين: مش فاكره حاجه

د.يحيى: هو يعنى كان فيه حد فاكر؟ ما هو كل اللى حلموا دول عملوا حلم من غير ما كان حد فاكر.

ياسمين: يعنى أحلم أى حاجه

د.يحيى: إسألنى الدكتور محمد، هو كان فاكر ولا كان عارف إن العربييه بهذا المنظر؟ العربييه كانت نازله لتحت، وهم سايبينه، وهو مش عارف هيه رايح فى أنهى داهيه، طيب صبرى طلع فوق (نشرة أمس) link، د. محمد نزل تحت ياللا يا ياسمين شوفى لك حاجة، ياللاً "أنا دلوقتى"

ياسمين: يعنى اقول حاجه ماحصلتش

د.يحيى: يانهار أبيض، بنقول حلم، هو الحلم حصل؟

ياسمين: لأه ماحصلش

د.يحيى: طيب شوفى بقى دينا علمتنا لما راحت منبهانا بكلمة "أعمل حلم..." يا للا يا ياسمين.

ياسمين: زى خيال كده؟

د.يحيى: كلمة خيال دى ما بنستعملهاش، بصراحة اللى أحنا عملناه ده مش خيال، إحنا بنعمل مش بنتخيل، ربنا يخليكى يا د. دينا عشان كلمة بنعمل دى...، ياللا يا ياسمين، "تعمل حلم"... أعمل حلم ياسمين: مش حاعرف

د.يحيى: يا ياسمين كل الناس عرفوا حتى اللى عملوه خفيف عرفوا، واللى عملوه زى سحر زى ساره عرفوا كل واحد على قد ما عرف، حتى عبد الحميد لما قلبه خيال (فى الآخر) قلنا ماشى ياسمين: يعنى أنا نفسى أكمل فى الدراسه

د.يحيى: لأه المسألة مش نفسى أكمل المسألة: أنا دلوقتى....

ياسمين: ماباعرفش، يعنى حلم يقظة؟

د.يحيى: لأه مش حلم يقظه، حلم بحق وحقيقى، يعنى أنتى بتعمليه دلوقتى

ياسمين: أنا باحلم إنى أنا دلوقتى فى الدراسه... صح كده

د.يحيى: لأه... فين الحركة؟

ياسمين: ما هو ده حركة برضه

د.يحيى: خلاص ماشى، كله ماشى

ياسمين: بعد كده تعبت وماقدرتش أكمل هو ده بقى كده وخلاص

د.يحيى: بالذمة ده حلم يا ياسمين؟ إنتى مش سمعتى زملائك من بدرى، و"تعمل حلم" مش أمنيه ولا

رغبه تحقيقها

د. ياسمين: .. الحلم اللي احنا عملناه وبنعمله كل واحد على قده.

د.يحيى: اللي قادر واللى مش قادر واللى عارف واللى مش عارف كلنا حاولنا بمنتهى الشجاعه أنا

كده زى ما أكون باتعرف عليكى من أول وجديد، بس برضه عاوزك تعمليه ولو بمساعده د. محمد أو

بمساعده د. دينا، تبتدى "أنا دلوقتى"، وبعدين حصل، وبعدين طلع، وبعدين نزل، زى ما محمد عمل

كده أنا دلوقتىهه

أحمد: إنتى كان ليكى أمنيه وماتحققتش ياللا حقيقها فى الحلم يعنى إجملى، وانتى فيها...

د.يحيى: شكرا يا احمد

أحمد: يعنى كنتى إنتى عاوزه إنك تبقى دكتورة، إجملى، إنك دكتورة وبعد كده صحيتى زى ما إنتى

المهم تحاولى

ياسمين: أنا باحلم دلوقتى.....

د.يحيى: مفيش باحلم "أنا دلوقتى..."

ياسمين: أنا دلوقتى فى الدراسه مثلا

د.يحيى: مفيش مثلا "أنا دلوقتى..."

د.مروه: فين

ياسمين: أنا باحلم إنى مدرسه ثانوى

د.مروه: قولى ده من غير كلمة "باحلم"

ياسمين: أنا دلوقتى فى المدرسه الثانويه وكنت فى الإمتحان وماعرفتش احل كويس، فيعنى نزلت

فى الدرجات، فبقيت يعنى...، فاللى فى البيت كلهم اتضايقوا من المدرسين وكده، وبعد كده خلاص

بقى.

تعقيب على استجابة "ياسمين":

❖ على الرغم من أنها فشلت تقريبا تماما فى "عمل حلم"، ومع

أنها لعبت بعد كل السابقين والسابقات، إلا أنني رحبت بإثبات هذا

الحوار بنصه لأبين صعوبة "عمل حلم" عند البعض، ومدى المقاومة.

❖ بالرغم من أن أحمد قد "عمل حلما" فيه كل مواصفات "وعى

الحلم" الذى فى الفروض، إلا أنه حين راح يساعد ياسمين ابتعد عن

ذلك تماما، وراح يتكلم عن نوع الأحلام الأقرب إلى "تحقيق الرغبة"،

وهى أبعد ما تكون عادة عن وعى الحلم الذى أردنا الكشف عنه

❖ تناقض موقف أحمد بين حالته وهو يمارس "عمل حلم"، وبينه

وهو يشرح لياسمين كيف ينسج الحلم من الخيال له أهمية خاصة فى

استبعاد ما "يسمى حلم اليقظة" من هذه التجربة، وأيضا قد يفيد فى

السماح بتحديد مستويات الأحلام حسب غلبة الخيال، أو غلبة الإبداع

فى وعى الحلم

❖ ظهرت ملامح باهتة بعد كل هذا الضغط حين استبدلت باسمين رغبتها أن تكون طبيبة، ورضيت أن تكون مدرسة، لكنها حين عملت حلما ولو بدرجة شديدة التواضع انقلبت تلميذة فاشلة، وهذا عكس التلميذة المضطهدة أو سيئة الحظ.

ونواصل

د. يحيى: (بعد فترة صمت...) ياه!! حتى ده يا ياسمين، شكرا، الله يسامحك فاضل حد غير رضا، ياللا يا رضا "أنا دلوقتى .."
رضا: أنا دلوقتى ساكنه فى بلد أرياف بقالى، كتير أوى فيها، كل لما أقعد فى مكان الأقى صاحب البيت يطلعنى منه، فمضايقه خالص فحاسه إنى أنا ماليش مكان أنا وولادى، كل لما أروح مكان يطلعونى منه فحاسه إنى أنا ضايعه،
يا للا يا د. يحيى أنت اللى فاضل
تعقيب على استجابة "رضا":

❖ رضا كما ذكرنا من البداية زميلة يقظة الحضور، جادة الحدس، جاهزة معظم الوقت، وهى لم تتردد فى الدخول إلى الحلم بسلاسة وحسم معا، حتى بعد أن هدأت حدة التداعى نتيجة لمقاومة ياسمين وتسطيحها.

❖ ركزت رضا على مواقف لها علاقة بظروفها الاقتصادية بشكل ما، لكن تصوير الحلم لذلك كان أكثر عمقا وإيلاما، وأسرع إيقاعا.
❖ بادرت "رضا" وحدها - كعادتها - واختارت من تبقى وهو المدرب (شخصى) دون أن يسألها، وكان ذلك طبيعيا لأن الجميع لعبوا، وكما ذكرت سالفًا، فإننى ألعب فى الآخر، حتى لا يتصور أحد أن هذا هو الأداء المطلوب.

د. يحيى: (بعد فترة صمت ليست قصيرة وهو مطأطئ رأسه)...

طلعت صعبه ياديننا، يخرب بيتك: أنا دلوقتى راكب فوق صبرى فى السما قالى إبعدي إنت ثقيل، قلت له أبعد دا إيه أنا جاى أركب لك جناح يامغفل، قالى ما أنا طائر من غير أجنحه، قلت له ما هو إنت لما تنزل حاتدشده، فراح نازل من قبل ما أركب له الأجنحه وأنا لسه فوق لاقيتى، إن أحنا حاندشده إحنا الإثنين، راح أبويا طالع لى وقال لى إنت ندل ولا معاك أجنحه ولا نيله، قلت له إمشى يا له، فراح صبرى مختفى فرحت نازل لقيتتى فى مدرسة رياض أطفال ولاقيت الأبله حلوه جيت أبصص لها، العيال زفونى وقالوا يا راجل ياعجوز مناخيرك أد الكوز، رحت طالع لاقيت الدكتور محمد، رحت واخده على قفاه، وركبت القطر بتاع دينا راحت هى ناظه من الناحيه الثانية، رحت طارد سارة وقلت لها بدال ما تشخى على نفسك إجرى إطلعى بره، بس خلاص .
التعقيب على استجابة "المدرّب":

❖ لا أنا توقعت، ولا أحد توقع أن أجد صعوبة بعد كل هذه المساعدات والشرح التى بدأت بها وكأنى أعرف المراد، أو كأنى - شخصيا - أستطيع أن أدخل إلى وعى الحلم بسهولة.

❖ الاعتراف بالصعوبة المبدئية، موجه الكلام للدكتور دينا التى كان لها الفضل فى استعمال تعبير "عمل حلم" ربما له دلالة أخرى

للاعترا ف مجددا بأهمية هذا التعبير لئبعنا عن أحلام الةقة.

❖ بتلقائية غير مقصودة بدأ الحلم ربطا بين معظم أحلام من سبقوه، مع إضافات مفاجئة، ونقلات سريعة، لم تخل من الموقف الخاص به من موقعه فى وسط "وعى الحلم".

❖ توجد استطرادات دالة على حركة الطفل داخله، وفى نفس الوقت الوعى بسنه (روضة أطفال، ويا راجل يا عجوز..) هذا بعد ظهور والدى، ثم رفض وصايته، بل ومخاطبته بـ "إمشى "يالة".

❖ قرب نهاية الحلم تواصل الربط التلقائى بين عدد من الأحلام: بين أول حلم وآخر التجربة، أول الحلم كان حلم دينا، والقطار، وقد تدخل المدرب فى حلم دينا كما سبق كأنه شاركها، ثم ها هو ينهى حلمه بمحاولة مشاركتها ، لكنها قفزت الناحية الأخرى ثم انتقل إلى إكمال حلم صبرى.

❖ أما تعقيبى على ضربى زميلى المتدرب د. محمد، على قفاه قرب نهاية الحلم ثم رفض نكوص سارة فبدا بعيدا عن حساباتى الظاهرة اللهم إلا إن كان رفضا لاعتمادية وتقديس هذا الزميل الطيب لأدائى، وكذلك رفضى بالنسبة لساره للتماهى فى النكوص حتى الذهان أو استسهال الحل العكسى بتكوين رد الفعل.

الخلاصة:

أولاً: للحلم وعيه الخاص به

ثانياً: يمكن استحضاره "هنا والآن: بعيدا عن الخيال وأحلام الةقة، قريبا من "حركة الإدراك" ووعى الإبداع".

ثالثاً: يمكن مشاركة آخر فى نفس الوعى، ليس فقط بإضافة فى التشكيل أو تعليق مكمل، ولكن قد تكون الإضافة بحدّة الانتباه والتصديق.

رابعاً: يمكن استنتاج أن هذا المستوى من التواصل فى "هنا والآن" وهو يبتعد قليلا عن وعى الةقة الحاد، ولا يدخل فى وعى النوم، أن هذا المستوى هو الذى يتراكم على مدى عمر المجموعة ويكون نواة لتكوين نواة الوعى المشارك إلى تخليق الوعى الجماعى.

[1] - لاحظ تدخل المرضى تلقائيا

[2] - لاحظ أن الموت فى الحلم وارد، لكنه ليس نهائيا، ظهر ذلك حتى منذ بدأ المدرب التجربة حين قال "وبعدين قابلت مش عارف إيه رحى متزحلقي، رحى ميت ومش عارف إيه، راحت طالعالى شجره ما كانتش موجوده.. إلخ)

[3] - النقط هنا تشير إلى أننا فى التفريغ سمعنا صوت المتكلم دون صورته، ولم نتبين من هو.

*** **

المؤتمر الدولي الأول: العلاج النفسي الجماعي والعمليات الجماعية

الأمل في الأوقات العصيبة

www.arabpsynet.com/Congress/CongJ37FirstInterConfEAGT.pdf

Brochure

www.arabpsynet.com/Congress/CongJ37FirstInterConfEAGT.Br.pdf

القاهرة - مصر
ورش عمل قبل المؤتمر: 24 ستمبر 2013
فندق موفينيك : 25-27 ستمبر 2013

info@eagt.net

*** **

في ذكرى تأسيسه : 10

شبكة العلوم النفسية العربية... تكبره

10 : شخصيات من أبرز العلماء النفسانيين العرب

بلقـــــــــــــــــج:

"الراسخون في العلوم النفسية"

www.arabpsynet.com/Rassikhoun/RassikhounCongrat.pdf

الطب النفسي :

يحيى الرخاوي - احمد بكاشة - محمد أحمد النابلسي - طادق السامرائي - عدنان التكريتي

علم النفس:

محمد الستار ابراهيم - مصطفى مجازي - علي زيعور - فدرى عفتي - أحمد عبد الخالق